

國朝詩人徵略

國朝詩人徵略卷六

番禺張維屏子樹勳

徐元文

字公肅號立齋江南崑山人順治十六年

賜進士第一人官至大學士有含經堂集

公從父官汀州推官疾率公往迎其喪靖南王耿繼茂慕公名餽金二千兩願一見公曰是貨取也卻其金卒不往見康熙十八年

召監修明史因請購遺書徵遺獻十九年遷左都御史請除三逆虐政在粵閩滇者二十七年遷刑部尙書

改戶部故事銷算錢穀悉委書吏事關外省索賄動千萬公與滿尚書鄂爾多銳意釐剔句稽出納不假吏胥手二十八年拜文華殿大學士公與兄健菴俱好士累散千金赴人之急然健菴性豪放食客滿門下頗招權利致爲臺臣所劾而公介然謹禮法慎擇人門庭肅然以原官致仕歸舟獨圖書數千卷及光祿饌金三百而已三十年秋七月

卒于家年五十八

二林居集

立齋官祭酒請仿順治舊例於郡邑各庠選取文行兼優者及副榜送監肄業部議著爲例

荻汀錄

摘句 鳥飛天外山如鏡人到雲中海似杯

葉方謫

字子吉號詡庵江南崑山人順治十六年

賜進士第三人官至禮部侍郎加禮部尙書諡文敏有讀

書齋偶存稿

方謫釋褐後卽以文章受知

世祖章皇帝其授學士述懷詩所云敢道齊賢畱異日屢  
稱蘇軾是奇才記是事也後復蒙

聖祖仁皇帝召入

內廷矢音廣唱歌咏昇平詩格亦進而益上

提要四庫

康熙己未鴻博科

特命文敏校閱試卷所拔皆一時名宿人服其公

江蘇詩徵

康熙丁巳春進講通鑑講義

上問諸葛孔明何如伊尹葉方藹對云伊尹聖人諸葛亮大賢大抵伊尹可比孔子諸葛亮可比顏淵

上首肯一日講博學之節

上云知行孰重葉對云宋臣朱熹之說以次序言則知先而行後以功夫言則知輕而行重

上云畢竟行重若不能行則知亦空知耳

池北偶談

學士家居有密陳其居鄉不法者

上命蘇撫田雯察之雯以鄉評之實入奏

上曰朕固知葉方藹不如是也

感舊集補傳

標題

關隴平

四言

海氛清

四言

摘句

偶隨落花入忽見羣峰迎

草暖庾郎盤馬地絮飛謝女詠詩天

漫防酒醉先防醒不怕花殘却怕開

彭孫通

字駿孫號羨門浙江海鹽人順治十六年進士康

熙十八年

召試博學鴻詞第一官至吏部侍郎有松桂堂集

洪惟我

聖祖仁皇帝武功耆定六幕大同黼黻昇平右文稽古旁

求俊乂肇舉

制科於時

景運方隆人文蔚起懷才抱藝之士雲蒸鱗集成詣

金門司校閱者雖有李蔚杜臻葉方藹馮溥四人而

甲乙次第皆稟

睿裁如王士正池北偶談所記施閏章省耕詩中誤書旗

字爲旂字

詔降置次等一事仰見

粹鑒精詳不遺纖芥故得人之盛今古罕儔而孫通遠

昌期寶冠是選文章聲價紙貴一時今觀是集才學富

瞻詞采清華館閣諸作尤瑰瑋絕特知其獨邀

甄拔領袖羣才不偶然也

提要四庫

南昌重建滕王閣名流賦詩推彭少宰擅場中聯

云依然極浦生秋水終古寒潮送夕陽余謂劉文

房郎君胄無以過也又題湖口句云湖光盡日依

樓堞山色終朝滿縣城亦是寫照

漁洋詩話

標題

陳白沙草書歌

七古

西洋酒船歌

七古

摘句

暝色起何處忽然雲水昏春燒如新月遠



掛山一痕

臨行千萬語雜亂初無端情至不厭煩憂  
來且自寬

殘春風送客終夜月隨舟

一春又向他鄉盡千里曾無尺素來  
夢回楚瑟千峰碧望入湘帆九面青

黃與堅

字庭表號忍庵江南太倉人順治十六年進士康熙十八年

召試博學鴻詞官贊善有忍庵集

與堅童年穎悟詩一目文二三日卽記憶年十四  
慨然有志于古學欲徧讀周秦以下書三年讀周  
末諸子及六朝以上者幾盡今世說  
摘句 可憐今夜月重搗去年衣

地懸淮海艱消息人歷冰霜倍老成  
太學古文看石鼓故人佳句憶金鋪

鄭日奎

字次公號靜菴江西貴溪人順治十六年進士官  
工部主事有靜菴集

康熙壬子日奎與王士正同典四川鄉試士正詩

所謂水部風流似鄭虔者也

四庫提要

摘句 人生苦形累無形復何云

濕雲凝不流鳥聲雲內外靜覺雷雨蓄幽  
疑鬼神會因想開闢初五丁力稍懈一罅  
不及補千古詫奇怪

一綫天

乃知名山遊事與讀書類細討理愈出一

到一回異

重遊一綫天

周 燦

字星公陝西臨潼人順治十六年進士官南康府  
知府有願學堂集

周禮部自安南使歸有詩一卷頗見風土

雜談

安南舊有鬼門關周星公易其名曰畏天關有句

云題曰畏天思此義萬年帶礪控炎荒

聽松廬詩話

摘句 一水隨人千百折中宵勒馬問安州

秋來結就檳榔果交子逢人代煮茶

曹玉珂

字陸海陝西鎮安人順治十六年進士有緩齋集

柏鄉相國觀始集載陸海詩甚夥

百家詩小引

摘句 人道從前原夢夢我觀是處有蒼蒼

弱孫學語能看月長子行文可望秋

王追騏

字錦之號雪洲湖北黃岡人順治十六年進士官

山東道

雪洲由詞林陟諫垣以忼直忤時

百家詩小引

摘句 人向花前老春從客裏歸

男兒無別淚多半是吞聲

彭鵬

字奮斯福建莆田人順治十七年舉人官至廣東

巡撫有古愚心言

康熙甲寅耿精忠叛逼脅受職凡九拒僞命卒得

不污其平生以氣節著

四庫提要

摘句 桂性歲增惟老辣葵心晨發卽朝陽

董俞

字蒼水號樗亭江南華亭人順治十七年舉人有  
浮湘度嶺諸藁

俞渡洞庭風浪大作上流覆舟僮僕震懼俞坦然  
危坐賦二詩投湖中竟得無恙今世說

摘句 孤帆收夕照漁火亂春星

崔華

字不雕江南太倉人順治十七年舉人有櫻桃軒

集

崔華性孤潔寡合吳梅村目爲直塘一崔

池北偶談

余庚子爲同考官得崔華工詩畫嘗有句云一寺

千松內飛泉屋上行欹檣坐清晝薄冷出蘋間溪

水碧于前渡日桃花紅似去年時此例甚多

漁洋詩話

摘句

蕭瑟滿江上一鴈蘋際飛水氣雜漁烟微

茫入清暉

丹楓江冷人初去黃葉聲多酒不辭

馬世俊

字章民號甸臣江南溧陽人順治十八年

賜進士第一人官翰林院侍讀有匡菴集

狀元對策隨題敷衍者多先生獨侃侃直陳不負  
所學何義門云我

朝狀元前劉後韓公居其間鼎足爲三

詩別裁國朝

先生工書畫有二右之目謂右軍右丞也

京江舊集

馬章民下第畱京落拓殊甚以行卷謁芝麓司寇

司寇讀至而謂賢者爲之乎題文後比數亡主於

馬齒之前遇興王於牛口之下云云司寇曰李嶠

真才子也歲暮贈炭金章民得八百兩明年遂狀

元及第賢哉司寇非褊心者所能及也

茶餘客話



摘句 素交真似水大隱豈須山

洞庭芳草連天遠震澤孤帆帶雪飛

張玉書

字素存江南丹徒人順治十八年進士官至大學士謚文貞有張文貞集

是集春容典雅淪淪乎

盛世之音其拖諸山狼居胥山二碑敘述

聖武神功皆爲詳贍足以昭示萬世其紀平定江南事紀滅闖獻二賊事紀三路進師下雲南事紀平水西事皆端緒詳明得諸耳聞目見足以彰開國之

鴻烈紀順治間樂章及錢糧戶口三篇皆足資掌故而紀

陝西殉難官事一篇亦足與史傳相參

提要 四庫

張文貞不肉食父湘曉貽書戒之曰此非養身之

道食不厭精汝未讀鄉黨耶退直後宜靜坐片刻

養身節勞文貞聞命悚然加一餐

茶餘客話

文貞從容啓沃有古賢相風公退清齋讀書友愛

之篤比於蘇氏

江蘇詩徵

摘句 褒鄂宗臣張左肅薛岐帝胄領中權

檻前碑版畱三國樹杪江流咽六朝

葉映樞

字炳霞號蒼巖江南上海人順治十八年進士官至湖廣布政司參議有葉忠節遺橐

武昌撫標叛兵夏包子作亂映樞死之

特贈工部右侍郎

賜諡忠節映樞嘗與李基和合刻詩集

四庫提要

康熙二十七年炳霞官湖廣糧儲道權布政使夏

逢瓏等驟亂圍其衙炳霞乃遣妻女奉母自水竈

出刺血書付其僕朝服坐堂上自剄死

則海

摘句 山截大河仍北向心隨清渭欲東流

人家板屋風聲裏思婦寒衣淚眼前

孫蕙

字樹百號泰巖又號笠山山東淄川人順治十八年進士官給諫有笠山詩選

詩格清麗無塵俗之氣而邊幅微狹

提要四庫

君令安宜飲冰茹蘗上官以苛令濬河將申以非法士民感憤不呼而至者萬餘人負畚河千六日夕遂告成事士民繪圖歌詩以紀之

山左詩鈔

標題

行路難

古

安宜行

古

濬河行

古

摘句

一帆涼月轉四面翠屏開

遠寺山支閣層田水疊梯

河聲入洛三門合嶽色來秦萬里明  
島藏諸國晴時見風捲洪濤靜夜聞

吳光

字迪前號長庚浙江歸安人順治十八年

賜進士第三人官翰林院編修有南山草堂集

康熙三年光奉

命往冊封安南時海外初服未識大體光移書宣諭之贈

遺一無所受風節凜然

湖州府志

光有使交集漁洋選十三首於感舊集

吳興詩話

摘句 月皓清湘流雲空九疑外

舟向猿邊下人於鳥上行

碧樹漢陽郭青山黃鵠磯

草換今年色花含隔歲心

星河平向窗中出江漢交迴檻外流

王維坤

字幼輿直隸長垣人順治十八年進士

幼輿有驛路俯江流句余頻年來往荆黃襄漢間

始知五字之確

聽松廬詩話

摘句 風雨愁連小寒食鄉關淚濺閨花朝

董含

字閭石號榕菴江南華亭人順治十八年進士有

藝葵草堂稿

董兪弟也詩格高雅過其兄

四庫提要

摘句 戰鬥八年能獨霸殺降三戶竟無功

香飄下界青冥近磬入諸天碧落寒

蘇楫汝

字延遜一字用濟廣東新會人順治十八年進士

官中書有梅岡集

薛二樵云先生好學嗜古卜請假歸侍溫清之暇

復關西巖與二三故交分題唱和

粵東詩海

摘句 老樹如老友廿載伴巖邱

山水厭雷同新故詎一轍

無營殊自貴多病不妨閒

一天月好人初醉三伏涼生夜已秋



國朝詩人徵略卷六

國朝詩人徵略卷七

番禺張維屏子樹軒

姚啓聖

字熙止一字憂菴漢軍人康熙二年鄉試第一官至福建總督有憂畏軒遺稿

姚啓聖由香山知縣削職耿精忠反啓聖以家財募兵赴軍前効力攻諸暨縣敗賊於楓橋遂委署諸暨縣又斬賊渠朱得福招撫數千人超擢溫處道精忠以重兵駐石塘阻我入閩之隘啓聖偕諸將攻拔之乘勝取雲和縣陞福建布政使十七年

擢福建總督賊帥劉國軒犯泉州甚急啓聖同平  
南將軍賴塔進討大敗賊於蜈蚣山破其七營復  
長泰縣又敗之江東橋賊勢大挫十九年水軍提  
督萬正色拔海壇孤軍先入啓聖及諸總兵繼之  
七路進勦破十九寨乘潮渡海克金厦兩島加大  
子少保二十年海賊鄭錦死啓聖多用金帛間其  
黨與因奏臺灣可平狀時鄭克塽有降志而僞行  
人傅霖反覆爲奸啓聖以計殺之二十二年同提  
督施琅進兵啓聖駐厦門督餉師渡海臺灣遂降  
郡縣其地鄭氏盤踞海上三世四十餘年一旦平

定戰功雖屬靖逆侯琅而平日招攜設問以搖

心啓聖之力爲多云

大清一統志

劉國軒敗澎湖凱旋琅於海道奏捷七日抵京師  
少保遣飛騎由內地馳報遲琅二日琅已先封靖  
海侯矣少保生平慷慨仗義揮金如土又能恤文  
人於各州縣多置學田以培寒畯

全漸詩話

公長七尺白皙目光四射用弓至二十石麾下養  
奇材劒客皆能得其死力臨陣應變如神而性慈

不妄殺戮

隨園文集

方海患亟時

詔徙瀕海民實內地流離失業者衆以熙止請復其故民

閒肖熙止像生祀之

測海集

摘句

正宜明月上不礙白雲歸

看梅

荒陲百事怡情少孤島三年戰血多

千里波濤孤枕上萬家饑溺夢魂中

嚴我斯

字就思號存菴浙江歸安人康熙三年

賜進士第一人官至禮部侍郎有尺五堂詩刪

我斯立朝端介致仕後杜門謝客著述自娛

湖州府志

摘句

九龍之山環九峰一峰一態如一龍興雲

出雨氣磅礴鱗甲欲動凌蒼空別有一峰  
伏而起神奇天矯爲龍尾世人咫尺不知  
名古來畸士都如此

田雯

字綸霞號山蘊山東德州人康熙三年進士官至  
戶部侍郎有古懽堂集

當康熙中年王士正負海內重名雯天姿高邁記  
誦亦博負其縱橫排奐之氣欲以奇麗駕士正上  
故詩文皆組織繁富鍛鍊刻苦

四庫提要

先生由進士除秘書院中書舍人中書號丞相掾

在昔以貲郎供職有御史言機務重地宜用進士  
參是選始闢此徑久之遷水部應鴻博試最先交  
卷被落題溫飛卿集後云一代才名乾牒子八吟  
叉手亦徒然不教詞賦陪雕輦空讀南華第二篇  
旋摧江南提學入爲京朝官出撫江南尋調黔會  
不十年事也

國朝名  
家小傳

學使田公來江南從兩驢蒼頭奴兩人戒有司勿  
給供張自市蔬菜十把脫粟三斗

山左  
詩鈔

殷彥來於除日餽詩田山蘊先生謂其意良厚報  
以詩云玉板熟參嫌味澀木奴冷擘帶酸嘗

都下  
餽歲

率以何如殷子新詩美餽歲敲門十五章此可

門生餽歲添一韻事

聽松廬詩話

標題

癸丑

五古

翠微寺

五古

元祐黨籍碑歌

七古

碧嶢書院歌弔楊升菴

七古

摘句

雨過庭翠滋一鳥發清籟

萬頃藕花風收之襟帶間

水樹色相映淨綠生衣裳日薄無倒影石

髮有冷光

側行貼壁轉半嶺盪層雲徑仄左足欹在

外懸二分



驛路秦川雨春風蜀道花  
青山遮馬首紅葉壓行裝  
異鄉逢七夕客路又三年  
門人爭送酒小吏解吟詩  
醉仍畱客坐老畏送春歸  
病深思入道交久漸知人

平野千村連廣武長隄一線束黃河  
亭邊小沼春泉響衣上新泥燕子來

曹禾

字頌嘉江南江陰人康熙三年進士十八年

召試博學鴻詞官至國子祭酒

天與人以富貴乃與以濟人利物之資也富貴有  
權力而不思濟人利物是謂違天魏和公詩云賢  
哲不易生天地鍾全力授以富貴資具有生民責  
真能說出造物心事而曹頌嘉詩賢才既當權數  
語亦足與此互相發明

聽松廬詩話

摘句 賢才既當權造化辭苦辛雷雨亦待治雲  
物非空陳自有濟世功千載勞其身

曹貞吉

字升六號寶菴山東安邱人康熙三年進士官禮

部郎中有寶菴詩略

貞吉詩格適鍊其黃山諸作極爲宋犖所推在京師時和其文姬歸漢圖等長歌極有筆力今檢集

中不載

提要 四市

標題

雪中作

五古

清流關

七古

過滕縣偶成

五古

書浯溪碑後

七古

摘句

月明潮滿圍孤嶼野闊天低見大星

清罇江上蕭條別暮雨聲中去住身

十千酒醒吳江鱸第二泉烹顧渚茶

勞之辨

字書升號介庵浙江石門人康熙三年進士官至副都御史有靜觀堂集

康熙戊子江浙米價騰湧皆由外洋搬運介庵疏

請嚴海禁價得漸平

兩浙輪  
轉錄

摘句 酒能供客醉花不厭官貧

趙士麟

字玉峰雲南河陽人康熙三年進士官至吏部侍郎有讀書堂集

是集爲士麟所自編凡語錄四卷文十七卷詩二

十一卷條約四卷

提要  
四庫

雲南遠隔萬里風詩難采少宰詩亦不多見故所

收止此

國朝詩別裁

摘句 名通上國由莊躋威鎮諸侯自伏波

鎮寧

天入炎荒時苦雨途經冷驛夜無霜

黔陽

盛符升

字珍示江南崑山人康熙三年進士官御史有誠

齋詩集

聖祖南巡符升年八十五獻兩京賦三駕平剏賦

御書年登大耋四字賜之

崑山新志

摘句 澗瀍合處開雙闕河洛分來會北邙

九派微茫看楚澤數峰彷彿擁湘靈

方殿元

字蒙章號九谷廣東番禺人康熙三年進士官江寧知縣有九谷集

九谷著環書自成一子欲究天人竅奧其詩高華

伉爽依傍一空品不在嶺南三家下

國朝詩別裁

殿元能以經術飾吏治引疾去僑寓蘇州寘祭田

百畝且以田給兄弟之貧者

廣東通志

標題

廬山玉淵

五古

秋夜長

七古

君馬黃

七古

褒斜道

七古

摘句 雨中歸餼婦雲裏出樵人

平野雪深迷督亢大寒冰合度滹沱  
銀燭影前人似玉碧梧枝上月如鉤

繆彤

字歌起江南長洲人康熙六年

賜進士第一人官侍講有雙泉堂集

二月二十六日榜發有名三月二十日殿試二十  
二日傳臚諸進士跪

丹墀下聽唱第一甲第一名係彤名唱名畢行三跪  
九叩頭禮彤隨禮部堂官捧黃榜從

御道出跪置龍亭內鼓樂迎至東長安門張掛順天府府尹府丞迎彤與張玉裁董訥等三人至殿內簪花酌酒用儀從至順天府赴宴先望

闕叩頭府尹府丞率僚屬對立行四拜禮然後就席用敘坊樂徹席望

闕謝恩府尹府丞送至寓二十四日同張董兩同年求謝

恩表舊例前科狀元代作所以尊前輩以其知體式也二十五日到禮部與恩榮宴四月初二日午門外頒給彤袍帽水晶金頂涼帽一頂鑲蟒石青朝衣一



件玳瑁銀帶一條荷包牙筒刀子俱全馬皮靴一雙當時更易率諸進士行三跪九叩頭禮初七日國子監釋褐二十日吏部引見二十二日奉旨授彤秘書院修撰二十五日入

朝謝恩二十八日同張玉裁董訥到任先謁

孔廟次謁土地祠土地神爲韓昌黎先生謁畢卽至內院報到任日期典籍移咨吏部開俸是日選庶吉士二十九日奉

旨帥顏保范承謨教習庶吉士五月五日大會同館諸同年於金魚池十五日到內院請進館日期十九日

早齊赴翰林院投教習老師請啓二十六日進

門午時教習老師到任

臚傳  
記事

歌起家居不干世事立三畏書院刊曹月川家規

蔡虛齋密箴劉念臺人譜率後進以爲標的

荻汀  
錄

歌起渡江詩云涼月漾中流金山隱隱浮尙餘殘

醉在和夢到揚州末五字何減唐人

國朝  
詩別裁

摘句 入世性情古還鄉面目真

張英

字敦復江南桐城人康熙六年進士官至大學士

謚文端有文端集

英仰蒙

聖祖仁皇帝擢侍

講幄入直

禁廷簪筆雍容極儒臣之榮遇矢音麇唱篇什最多  
其間鼓吹昇平黼黻廊廟無不典雅和平至於言  
情賦景之作又多清微淡遠抒寫性靈臺閣山林  
二體古難兼擅英乃兼而有之

四庫提要

張文端云年來得一法守方寸之地製爲一城堅  
閉四門不許榮辱升沉生死得失之念闢入其中  
更有安心一法非理事決不做費力挽回事決不

做不可告人事決不做衙門中事因物付物不將  
迎於事前不留滯於事後所以每以輒酣當食輒

飽

茶餘  
客話

張硯齋相國詠風鳶有云九霄日近增榮彩四野  
風多仗寶繩真金華殿中語同上

張文端嚴陵江詩通首格意俱高結云翻嫌人好  
事高築子陵臺此意尤未經人道聽松廬  
詩話

摘句 面無憂喜色胸無寵辱情始知於陵子灌

園逃公卿

柳陰春水曲花外暮山多

葉底花開人不見一雙蝴蝶已先知

臨水種花知有意一枝化作兩枝看

魏麀徵

字蒼石江南溧陽人康熙六年進士官邵武府知府有石屋詩鈔

詩材清拔根柢不深如曉行詩暗燈移附壁句白是束裝真景而刻畫瑣碎已入武功末派提要摘句 我已無親侍兒行又遠親

汪懋麟

字季角號蛟門江南江都人康熙六年進士官

部主事有百尺梧桐閣集

其詩法傳自王士正而才氣縱橫視士正又爲別

格

提要 四庫

蛟門以刑部主事充纂修官一日禁中出宮箋自  
番命羣僚書擇其尤者二十四幅供

御屏用蛟門與焉其臨歿絕句云惡夢虛名久未閑孤寒  
倦鳥乍還山平生心事無多子只在儒臣法吏間  
嘗大會名士於都城之祝氏園酒半言欲盡酹開  
元大歷諸家獨尊少陵爲鼻祖而昌黎眉山劍南  
而下以次昭穆徐健菴獨抗論與爭謂宋詩頗放

無蘊藉不足學學之必損風格辨難喧呶林鳥皆

拍拍驚起

國朝名  
家小傳

君歸田後既得疾彌留令洗硯磨墨烹佳茗以進

自言香沁心骨口占二絕大笑呼奇絕而逝

漁洋  
文略

標題

河水決

七古

凌烈婦

七古

摘句

青春寒食還家近白髮慈顏對酒開

何用黃金壯顏色滿船書畫下揚州

顏光敏

字遜甫一字修來山東曲阜人康熙六年進士官

考功郎中有樂園集

君好讀書善鼓琴精騎射尤耽山水性孝友勤於

陸族

曝書亭集

樂園年甫四十而玉折蘭摧生平不信浮屠星  
之說嘗曰軀體猶炭神氣猶火火傳于炭然後能  
爲功炭當風則易燼扇之則立燼置密室覆以灰  
則後燼然則謂人可長生者妄也謂死有時不可  
先不可後者亦妄也

國朝名家小傳

標題

白雲峰

古五

南峰

古五

汶陰禹廟歌

古七

關鷄行

古七

摘句

白帝觴百神衆峰爲籩豆



望中三輔道別後萬重雲

萬壑深松寒白日三峰積雪照黃河

喬萊

字子靜江南寶應人康熙六年進士十八年

召試博學鴻詞官翰林院侍讀有使粵諸集

河督靳文襄輔河工一疏

廷臣多是其言萊持議河臣之言有四不可行

上是之河臣之議乃寢未幾中蜚語罷歸

荻汀錄

先生歸築亭曰吟詩送老處

江蘇詩徵

喬石林過高郵詩有云舫艫婦子巢塲圃魚龍舍

買薪須論斤賣兒不計價寫水災語沉痛聽松廬詩話

標題 元祐黨籍碑五古 過應山弔楊忠烈公七古

摘句 入門乍喜松杉大把酒深憐故舊稀歸里

方象瑛

字渭仁浙江遂安人康熙六年進士十八年

召試博學鴻詞官編修有健松齋集

錦官集康熙癸亥典試四川所作舊遊詩未仕時

遊鄴遊燕遊越遊楚作萍留草避兵杭州時作都

門懷古詩作於辛酉官翰林時倦還篇則乞假歸

里時作也四庫提要

標題

龍洞背

五古

七盤關

七古

摘句

萬疊連青屏  
榛莽盡開拓  
間存斧鑿痕  
當

年記棧閣二千九百間  
遺址尙如昨  
夾峴

曲闌千秋花互開落

陳玉璫

字賡明號椒峰江南武進人康熙六年進士官中

書有學文堂集

王暉今世說稱玉璫每讀書至夜分兩眸欲合輒用艾灼臂蓋亦苦學之士又稱其爲詩文旬日之閒動至盈尺則貪多務博可知

提要四庫

賡明少有大志凡天文地志兵刑禮樂河渠

諸大事莫不講求爛熟

今世說

摘句 乾餿本細事或以戕其身

客久才逾老思深夢轉疎

國朝詩人徵略卷七

國朝詩人徵略卷八

番禺張維屏子樹軒

陸隴其

初名龍其字稼書浙江平湖人康熙九年進士官知縣行取御史諡清獻有三魚堂集

讀朱隨筆陸隴其撰隴其之學一以朱子爲宗是編大意尤在於闢異說以羽翼紫陽故於儒釋出入之辨金溪姚江蒙混之弊凡朱子書中有涉此義者無不節取而發明之

四庫提要

三魚堂賸言陸隴其撰隴其傳朱子之學爲

國朝醇儒第一是書乃其緒餘而於名物訓詁典章  
度數一一精核乃如此凡漢註唐疏爲講學諸家  
所不道者亦皆研思深索多所取裁可知一代通  
儒其持論具有本末必不空言誠敬屏棄詩書自  
謂得聖賢之心法其於朱陸異同非不委曲詳明  
剖析疑似而詞氣和平使人自領亦未嘗堅分壁  
壘以詬厲相爭蓋諸儒所得者淺故爭其名而不  
足隴其所得者深故務其實而有餘同上

三魚堂集陸隴其撰是集爲其門人侯銓所編隴  
其一生非徒以講明心性爲一室之坐談其兩篇

縣尹一爲諫官政績亦卓卓可紀蓋體用兼優之  
學銓乃徒知以太極論冠篇欲使隴其接迹周子  
而以其循績別爲外集尊空言而薄實政是豈  
其之旨乎

同上

公年二十七補生員館嘉善李氏爲銘云洪範六  
極弱居其所貴讀書變化氣質當斷不斷爾自  
詒戚又云生者待汝養死者待汝葬天下後世待  
汝治汝母或輕爾身以殉無涯之慾而喪厥志康  
熙五年舉鄉薦九年中禮部試廷對極論時務十  
四年出知江南嘉定縣有大賈汪氏餽千金公弗



內其僕占賣薪者妻爲所控公訊而還之衙胥舊千數至是去者過半其在者無所得食公令更番給事退則爲耕販以自活有所遺攝計日與錢遠者許就民間一飯有括索者必痛懲之催科立甘限法令應輸者自爲限屆期輸及半卽免杖有諱子不孝者公爲出涕自訟德薄無以化汝爲委曲曉以天性父哭子大哭槌其胸曰吾非人也公慰而遣之十五年南方用兵徵餉十萬公爲文諭民激以大義不一月而數足又奉部牒抽市肆錢一年公造冊不及卹野巡撫慕天顏不悅別遣屬吏

到縣檢括而疏劾公無肆應才部議降二級用民  
罷市日號巡撫門巡撫不自安再疏請開復而公  
復以盜案免官去之日哭聲震衢路十七年

詔求博學鴻儒工部主事吳源起舉公以應至京未及試  
丁父憂奔歸朝夕不離殯側終喪不飲酒不食肉  
不入內寢二十二年入京牒部改教官弗允先是  
魏敏果公薦公尋授直隸靈壽縣旣至革火耗絕  
私派衙中興造及日買蔬薪魚肉皆出見錢舉鄉  
飲酒禮行鄉約朔望詣學宮與諸生講切道以躬  
行著松陽講義二十五年巡撫于襄勤訪民間利

病公陳六事一正月開倉太急宜緩一墾荒起科  
爲限宜寬一水利宜興一積穀宜廣一州縣存留  
公使錢宜復一審丁溢額宜裁于公疏薦爲大學  
士余國柱所沮二十九年靈壽大饑

詔發二千金以賑公徧歷山谷審其戶口盡賑之左都御  
史陳文貞薦公去之日哭送者數萬如去嘉定時  
八月試四川監察御史十月上疏請蠲免被災錢  
糧又疏言于養志不宜在任守制明年六月疏論  
保舉之捐納宜停十月試俸已滿都察院注公不  
稱職對品外調遂移疾歸三十一年館虞山席氏

歲暮還家一夕腹痛卒年六十三公教人必授以  
朱子小學刻程氏讀書分年日程俾學者循序致  
功公卒之明年

詔以公提督江南學政近臣奏公已故

聖祖嗟歎久之雍正二年

世宗臨雍釋奠畢諸臣請以公從祀

孔子廟庭

制曰可乾隆元年

賜諡清獻贈內閣學士兼禮部侍郎

居二林集

君爲嘉定令民有宗族爭者則以族長逮之鄉里

爭者則以里耆逮之又有自追牌則兩造要而來  
不煩吏也尤申明鄉約鄉長保甲之制其舉鄉約  
必擇知文義行端慤者規條備具

午亭  
文編

公生日老稚千數焚香拜堂下有百歲老人願一  
識爺曰自我爲民以來未見有官如爺者也

測海  
集

國初醇儒首推陸清獻公湯文正公湯爲巡撫陸爲  
知縣其見於事業陸較湯爲難至其有體有用未  
嘗不殊塗同歸也湯文正學於孫鍾元自言居官  
遵呂叔簡又以未得見魏叔子爲恨而陸清獻寄  
詩與范彪西稱之曰大儒又謂與徐世沐往還頗

得其益可見二公當日虛懷若谷慮以下人未嘗  
自命爲獨得真傳上接道統其後推爲一代醇儒  
衆無異辭者所謂實至名歸而要其不可及者在  
實事不在空言在躬行不在口說也清獻之學專  
宗朱子其論人未免過嚴於太史公傳游俠則以  
爲陋於韓昌黎上宰相書則以爲耻於淵明太白  
則譏其酒酒於東坡則詆其近禪於陽明則尤排  
擊不遺餘力至謂明之亡不亡於寇盜不亡於朋  
黨而亡於學術無乃已甚且由斯以談三代下不

幾少完人與

松心  
日錄

爲君旣不易爲臣良獨難而難莫難於知縣陸清  
獻公與堦書云看來此道到底難行惟書生舊業  
覺津津有味又云大計後儻得免罷黜當尋一脫  
身計不能久向勞擾中作生活矣竊思清獻體用  
兼備名重當時猶欲早尋脫身不敢久於其職况  
知縣之難有不止於勞擾二字者且今所謂難更  
有爲清獻當日所未嘗有者是以屏在楚北五載  
卽引疾乞休自顧無德無能惟知難而退求吾心  
之安耳讀公文集因識數語於篇末

總松唐  
文鈔

摘句

仕宦如奕棋勝負何足論所貴有天爵到

處自長存

人生貴知道豈必登廟廊君不見詩人拳  
拳十畝桑子陵老布衣咄咄勝侯王堯夫  
安樂窩至今仰清光

我歸安耕鑿村農是吾儔一經付豚兒坦  
然便無愁

徐乾學

字原一號健菴江南崑山人康熙九年

賜進士第三人官至刑部尚書有憺園集

乾學家富圖籍



聖祖仁皇帝購求遺書乾學奏進十二部其疏今在集中

近所藏雖已散佚而傳是樓書目猶存於世所著

讀禮通考及續宋元通鑑長編皆闕通淹貫確有

可傳

提要四庫

司寇主順天鄉試拔韓文懿熒於遺卷中遂大魁

天下文體爲之一變

荻汀錄

先生退朝之暇簪履滿堂口酬辨問手在簡箋耳

受陳稟兼施並給曾不錯誤先生愛才若渴絕不

爲私然交遊太廣聲氣大通其家人門下客不無

緣之以爲茲而士之失職不平者復鼓唇搖舌其

間蜚語謠言傳播坊市於是大臣連章劾奏賴

天子明聖置不問先生遂謝病乞歸五疏乃得請

命修一統志倣宋司馬光故事書局自隨

御賜光芒萬丈四字以寵其行逾年

詔以原官起用而宣

綸之日卽爲撤瑟之辰八百孤寒齊下崖州之淚矣

國朝名

家小傳

徐東海乾學爲司寇時人贈以聯云萬方玉帛朝

東海一點丹誠向北辰

茶餘客話

摘句 古人傾蓋間流品先已擇

慣對卷編常病眼與談忠孝卽開顏

一官雞肋中情淡萬卷牛腰遠道難

王 綬

字藻儒江南太倉人康熙九年進士官至大學士

有西田集

藻儒提督浙江學政最得士心時稱學聖已而海

歷六部正己率屬力持大體

湖海集

公喜菊科跣據地手捉菊蟲鄰叟意花丁也呼之

不應乃戲蹴之公曰叟亦愛菊耶卽贈與之

茶餘客話

公有古瓷直不貲一日李安溪索觀命奴捧之歷

階失足跌碎李不慙失聲公驚然不動

摘句 風定天門懸日月雨收石角挂虹霓

望岱

### 王士禛

字子測號東亭山東新城人康熙九年進士有古

### 鉢集

士正序述計東之言曰三王竝著詩名東亭之才

詎肯作蜂腰哉然自是士正篤念友于存此標榜

之詞耳其實士祿不及士正士禛不及士祿天下

之公評也

四庫提要

摘句 日落空山中但聞發樵響

李振裕

字維饒號醒齋江西吉水人康熙九年進士官至  
兵部尚書有白石山房橐

施世綸序惟述政績不及文章汪琬序稱其工於

臺閣之體

提要四庫

振裕察賑畿輔全活甚多奏免江西浮賦

大清一統志

標題

祠闕里雅

四言

摘句

樹杪湖光白雲邊石氣青

少不如人何況老過猶未免敢言功

許孫荃

字四山江南合肥人康熙九年進士官侍講

孫奎由戶部郎中督陝西學政勤於課士遇古聖

賢名蹟力爲修復表章敬待名儒李容輩爲刻其

所著書行世

大清一統志

摘句 兩邊峽束黃河去萬仞根連太華蟠

潼關

### 葉燮

字星期號橫山江南吳江人康熙九年進士官知

縣有已畦集

吳中稱詩多宗范陸究所獵者范陸之皮毛先生

著原詩內外篇力破其非

國朝詩別裁

先生謁選得揚州之寶應性伉直不能事大官不  
二歲落職先生欣然曰吾與廉吏同列白簡榮於  
遷除矣時嘉定令陸先生隴其同被參劾故云旣  
歸時汪編修鈍翁教授學者與先生持論鑿枘兩  
家門下士各持師說不相下鈍翁沒先生曰吾失  
一諍友矣因取向所摘汪文短處悉焚之

歸愚  
文鈔

先生攜家入橫山築小圃顏曰獨立蒼茫處宋牧

仲中丞訪之曰獨立蒼茫處容一立否

松陵  
詩徵

葉橫山有梅花開到九分絕句云祝汝一分畱作

伴可憐處士已無家可歸深情苦語

聽松廬  
詩話

標題

湖天霽

五古

採柳謠

五古

摘句

險分南服界雄見越王心

庚嶺

無處避愁應擇地有山送老不嫌貧

啼鵲花信他鄉到瘦馬衫痕落照寒

忽訝船窗送吳語故山月已挂船頭

盧道悅

字喜臣號夢山山東德州人康熙九年進士官知縣有公餘漫草清福堂遺稿

孫峨山鄉賢盧公墓志先生宰偃師始至當大旱餘流亡未歸荒蕪不墾先生撫綏多方不數年桑



麻遍野絃歌盈耳先生歸邑人爲生祠於亭歲時

伏臘及先生生日爭詣亭稱觥爲先生壽

山左詩鈔

標題 過興濟卽事

五古

摘句 萬事貴順天人力徒勞竭

有淚洒荒野無才事上官

脩禊客依芳草坐踏青人自綠楊來

戒殺未能難佞佛長生無用不求仙

臘酒當澄頭一甕梅花恰放兩三枝

不須迎向東郊去春在千門萬戶中

牛  
鈕

字樞臣滿洲人康熙九年進士官內閣學士

滿洲之有漢文進士自牛公始公性淳摯而意好  
閒靜斗室中左右圖書所談不及塵事至商酌經

史移晷忘疲

瞻園集

摘句 黃葉作秋語青山壓夢寒

林麟焜

字石來號玉巖福建莆田人康熙九年進士官至  
貴州提學有玉巖詩集

其詩法受自王士正初官中書時嘗偕檢討汪楫

奉使琉球途中唱酬甚夥

四庫提要

摘句 每逢并服蘭閣問欲乞羸秦未火書  
自是島夷知向學三閭瓦屋祀宣尼

國朝詩人徵略卷八

國朝詩人徵略卷九

番禺張維屏子樹輯

李光地

字晉卿號厚菴福建安谿人康熙九年進士官至大學士諡文貞有榕村集

周易通論李光地撰是書綜論易理各自爲篇其學一傳爲楊名時再傳爲夏宗瀾

四庫提要

周易觀彖李光地撰是編發明易理兼證以易象

與程朱二家頗有出入而理足相明

同上

光地所長在於理學經術文章非所究心然卽以

文章而論亦宏深肅括不雕琢而自工蓋有物之言固與輦悅悅目者異矣數十年來屹然爲儒林巨擘實以學問勝不以詞華勝也同上

公少好學康熙三年試策論舉于鄉九年成進士改庶吉士授編修尋乞假歸十三年耿精忠反海賊鄭錦踞泉州公奉親逃匿山谷間錦與精忠遣人招之公以死拒十四年五月密疏陳破賊機宜言耿逆悉力于僊霞杉關鄭賊亦并命于漳潮之界惟汀州小路與贛州接壤處賊守禦不過千百疲卒宜因賊防之疏選精兵五六千人詐爲入廣

由贛達汀爲程七八日耳仍恐小路崎嶇更使  
兵在大軍之前步兵又在馬兵之前庶幾萬全可  
以必勝置疏蠟丸申遣家僕夏澤開道出杉關赴  
京因內閣學士富鴻基上之奏入

聖祖嘉公忠下兵部錄其疏十九年至京授內閣學士因  
面對言鄭錦死子幼弱部下爭權宜急取之又言  
內大臣施琅習海上形勢知兵可重任

聖祖用公言奉平臺灣三十七年授直隸巡撫公在官清  
勤自厲卹民隱尤盡心農田水利三十九年

聖祖以子牙河屢汎濫發帑金

命公于獻河東西兩岸築長隄七月公以隄工旣成請開諸州縣水田引漳溢滹沱大陸諸水資灌溉四十一年飭各屬州縣興水利近山者導泉通溝近河者引流釀渠去水遠者鑿井溉田其水道應修濬者俱聽借帑興工四十二年擢吏部尙書四十四年授文淵閣大學士

御定諸書多委公參訂中有淆黷往復陳請不倦最後聖祖詔廷臣言知光地者莫若朕知朕者亦莫若光地矣於戲豈不榮哉然公位益高忌者益衆凡公所稱薦多見排擠因以憾公公恐啓門戶之禍益慎重

寡言其有獻納罕見于章奏惟與公共事內廷者  
時能道之五十四年乞休

詔許假二年五十六年至京五十七年卒子官年七十七

子祭葬諡曰文貞雍正元年贈太子太傅

二林居集

晉卿于當世人才賢不肖往往直言無隱陳北溟  
官江寧知府爲總督阿山所誣一日

聖祖問阿山何如人對曰臣嘗與同僚廉幹果于任事其  
失民心獨効陳鵬年一事耳頃之北溟遂

召入張孝先

伯行

爲江蘇巡撫與總督噶禮互糾忽

詔罷噶禮復孝先官

測海集



李文貞公扶持善類培植文人如白陳北溟之冤

救方望溪之死直張孝先之獄皆公之力也他如

楊名時

蔡世遠

惠士奇

王蘭生

何焯

諸人均被公

薦拔以經術文章顯名于時書曰人之有技若己

有之人之彥聖其心好之文貞有焉

松心日錄

標題

遊成雲洞

五古

摘句

坐呼采芝叟緩誦種瓜詩此是賢人心神

仙固詭辭自從崆峒來下迄華山希身授

帝者法不爲帝者羈

讀漢留侯傳

嫩絲舞緒風早麥搖新浪

月出連天近潮來帶海飛

人非本業皆無賴里有仁風卽太和  
富貴每因驕佚敗貧窮半是情游多

顧貞觀

字華峰號梁汾江南無錫人康熙十一年舉人官  
中書有積書巖集

梁汾臨沒時自選詩一卷授門人杜雲川太史不  
滿四十篇前輩嗜古淡不自足如此

國朝詩別裁

吳兆騫以科場事謫寧古塔貞觀與太傅明珠之  
子侍御成容若爲友懇侍御救之未卽許貞觀作

金縷曲二闕以寄兆騫侍御見之泣曰山陽思舊  
之作都尉河梁之什並此而三矣此事三千六百  
日中弟當以身任之貞觀曰人壽幾何請以五載  
爲期待御告之太傅兆騫遂以辛酉入關其詞云  
季子平安否便歸來死生萬事那堪回首行路悠  
悠誰慰藉母老家貧子幼記不起從前杯酒魑魅  
擇人應見慣總輸他覆雨翻雲手冰與雪周旋久  
淚痕莫滴牛衣透數天涯依然骨肉幾家能彀比  
似紅顏多命薄更不如今還有只絕塞苦寒難受  
廿載包胥承一諾盼烏頭馬角終相救置此札兄

懷袖又云我亦飄零久十年來深恩負盡死生師  
友宿昔齊名非忝竊只看杜陵窮瘦曾不減夜郎  
儻慙薄命長辭知己別問人生到此淒涼否千萬  
恨爲兄剖兄生辛未吾丁丑共些時冰霜摧折早  
衰蒲柳詞賦從今須少作畱取心魂相守但願得  
河清人壽歸日急繕行成稿把空名料理傳家後  
言不盡觀頓首貞觀有彈指詞三卷

感舊集  
補傳

摘句 由來澹蕩人別作流傳計

有龍蟠其下喧極眠更熟

漱玉亭

惆悵遠山青不盡倚篷閒却畫眉人

韓 葵

字元少號慕廬江南長洲人康熙十二年

賜進士第一人官至禮部尙書諡文懿有有懷堂集

文懿當

廷試日吳三桂逆節已萌對策力言三藩當撤無少顧忌

祭酒阿理瑚請以故相達海從祀孔廟文懿言海

造國書一藝耳未合從祀之典

葵江錄

元少在太學爲徐元文所知鄉試出乾學之門徐

公致仕憂患時人皆避禍元少挺身周旋之

江蘇詩餘

公嘗語門人張大受曰吾貴爲尙書何如秀水

十以七品官歸飯疏飲水多讀萬卷書

曝書亭集

摘句 萬里張騫曾鑿空九州鄒衍欲談天

少孫敢附龍門末後鄭常依馬帳旁

在昔唐衢常慟哭祇今宋玉與招魂

宋牧仲爲

唐六如  
修墓

王鴻緒

字季友號橫雲江南華亭人康熙十二年

賜進士第二人官至工部尙書有橫雲山人稿

妖人朱方旦以左道煽惑一時山人具疏列其罪

狀方旦伏誅

江蘇詩徵

山人以左都總裁明史

江蘇詩事

山人賜金園雜咏自序云丙寅請假省視蒙

賜白金文綺歸榮其親乃葺斯園以奉先大夫游憩會

鑾輅南巡遂邀

宸顧一邱一壑爛然生光實千載奇逢一郡盛事

江蘇詩微

摘句 驚看遊子面爲浣去時衣

永夜聞砧難入夢他鄉見月易思家

徐倬

字方虎號蘋村浙江德清人康熙十二年進士官

翰林院侍讀有蕢村集

倬年十七遊會稽受知於倪文正公因謁劉戡山  
遂以正學爲依歸成進士授編修乞歸養者十年  
主順天鄉試年已七十嘗輯全唐詩錄進

呈所著詩文十餘種合之爲贛村集

浙江通志

康熙乙酉

翠華南巡考試在籍諸臣拔倬第一授禮部侍郎

欽賜壽祺雅正扁額年九十卒

湖州府志

烏鬚藥前人集中罕見佳詠贛村先生有走筆謝  
談未菴惠烏鬚藥詩云妙藥封題百感生欲教鵲  
浴變烏黥拔心草已經霜萎半死桐難向日榮對



鏡只愁衣失素逢人還恐面先頰休將混沌娥眉

畫畱得天真此數莖頗有風趣

聽松廬詩話

標題

詠水碓

五古

騾車謠

第一首第四首第五首

摘句 人能欺白髮天不吝青山

人憐滄海遺民少話聽開元逸事多

多病百年兼恨別依人千里自途窮

病夫進路先思退傲吏還家不悔貧

四世兒孫齊抱槩

金唐詩錄

賜金鏤板

九旬兄弟

對舍僧

舟中倦客閒憑几不見舟移見所移

李基和

字協萬號梅崖漢軍人康熙十二年進士官至江西巡撫有梅崖集

聖祖南巡賜御書獨持風裁四字巡撫江西將赴任聞江西饑抵湖口遇賈艘將南下卽貸銀買之至南昌

發糶米價頓平

大清一統志

摘句 故人原上草新雁社前詩

潮迴北固雲爲岼山遶南徐樹作樓  
癸丑帖傳王內史春秋癖愛杜將軍  
清俸遠勞分故吏朝衣閒借與同年

徐元夢

字善長號蝶園滿洲人康熙十二年進士官戶部  
尚書署大學士諡文定

李文貞薦善長與德格勒並有學行康熙五十七  
年授兵部尚書雍正元年攝大學士乾隆七年奉  
詔稱徐元夢學問優裕踐履篤實謂之完人可無愧焉

測海

集

施愚山製苧帳題詩其上贈林茂之名曰詩帳徐

蝶園製詩枕名流多題詠二事俱韻

亞谷叢書

摘句 沙平疑地盡山豁訝天開

春陰屢嶂雲生戶水滿雙谿舫到門

性德

字容若原名成德滿洲人康熙十二年進士官侍衛有通志堂集

性德大學士明珠子

雅頌 熙朝

性德生長華閭勤於學問鄉試出徐乾學之門遂

受業焉九經解卽其所刻

提要 四庫

容若嘗輯全唐詩選晚乃篤意於經史

有懷堂文藁

綠槐陰轉小闌干八尺龍鬚玉簾寒自把紅窗開一扇放他明月枕邊看此納喇容若詩也於唐人

最近韓冬郎

聽松廬詩話

摘句 一花露中墜始覺單衣涼

山界萬重橫翠黛海當三面湧銀濤

山海關

彭定求

字勤止號訪濂江南長洲人康熙十五年

賜進士第一人官翰林院侍講有南畝詩稿

定求之學出於湯斌斌之學出於孫奇逢奇逢之學出於鹿善繼善繼之學則宗王守仁傳習錄四

庫提

公官修撰乞假歸時一庵公方家居講學公歸

請曰兒願得閉門讀書如章子人驚時意幾少祖  
前過乎公爲學初好宋五子又生平服明七子作  
高望吟七章七子者白沙陳子陽明王子東廓鄒  
子念庵羅子梁谿高子念臺劉子榕壇黃子也時  
有作書極詆陽明者公見而恟之以爲謂陽明倡  
爲良知之說病其爲禪則良知兩言出于孟子將  
并孟子病之乎又謂明之亡不亡于朋黨不亡于  
寇盜而亡于學術意以此歸獄陽明嗟夫誠使明  
季臣工以致良知之說互相警覺互相提撕則必  
不敢招權納賄則必不敢妨賢虐忠必不敢縱盜

戕民識者方恨陽明之道不行不圖誣之者顛倒  
黑白至于斯極也著陽明釋毀錄家居以禮自束  
觀花對酒有得輒發之于詩五十七年自爲墓志  
明年四月偶患腹疾翼日焚香啜茗而逝年七十

有五

二林  
居集

摘句 斜谷出師原比烈睢陽仗節本同心

文山  
祠

胡會恩

字孟綸號茗山浙江德清人康熙十五年

賜進士第二人官至刑部尙書有清芬堂集

詩有清腴之致而風骨未遒

四庫  
提要

會恩少從叔渭學具有淵源居官以勤慎稱

湖州府志

摘句 酒雜檳榔醉茶勻茉莉香最宜新雨後炎

暑變清涼

珠江雜詠

六朝寂寞青山在十廟陰沉畫壁殘

### 翁叔元

字寶林號鐵庵江南常熟人康熙十五年

賜進士第三人官刑部尚書有鐵庵文稿梵園詩集

司寇嘗具疏一請復積分之法一請令諸生習禮

肅觀聽一請嚴懲不率今太學剏聖釋菜禮司寇

所定也

江蘇詩徵



司寇少時貧甚叔父玉于先生周之助其成立故  
司寇以叔字命名誌不忘也玉于先生諱長庸順  
治丁亥進士官至布政司參議以清節著嘗遊粵  
與陳元孝梁藥亭諸先生唱酬甚歡參政六世孫  
遂食學使爲余述之如此

松軒  
隨筆

摘句 我身既非真况乃名氏假因復被虛聲從  
人置高下

竇氏已來關右表令公猶典朔方兵

王頊齡

字容士號珥湖江南華亭人康熙十五年進士十

八年

召試博學鴻詞官至大學士謚文恭有世恩堂諸集

頊齡值

文治昌明之日奏太平黼黻之音卽早年未達時作亦

無衰颯哀怨之意足以見其襟抱矣

四庫提要

文恭年躋大耋再疏乞休

賜詩有跡與松喬合心緣啓沃畱因自號松喬老人

荻江錄

摘句 百粵風烟通馬援八公草木走苻堅

早擒孟獲趨滇水急斷盧循入廣州

王吉武

字憲尹號冰菴江南太倉人康熙十五年進士官  
紹興知府有冰菴集

公守紹興治用寬簡迓大吏意時相國遂宣張公  
撫浙張固大賢保全良吏者數矣而瞰之者蓄怒  
於傍伺張去遂中以計典是時冰菴年始五十然  
難進易退終不復出公於詩固由天性亦稟家風  
祖孫父子兄弟人有集而母吳夫人及三女咸工  
詩家庭無事輒命諸子女拈題分咏吳夫人爲第  
其甲乙標芳競秀以爲笑樂

國朝名  
家小傳

標題 重修六賢祠成展祭作五古 許由瓢 劉

參軍鍾，郭汾陽胄。李臨淮韓中，乃

摘句

用才或相違，不如委溝谿。

趙執信

字仲符，號秋谷，一號怡山。山東益都人。康熙十八年進士官贊善，有因園集。

執信娶王士正之甥女，初相契，重相傳，以求作觀海集序。士正屢失其期，遂漸相詬，厲讐隙終身。其後沿波逐流，遞相祖述，堅持門戶，入主出奴，曉曉然迄無定說。平心而論，王以神韻縹緲爲宗，趙以思路剴刻爲主。王之規模濶於趙，而流弊傷於膚。

廓趙之才力銳於王而末派病於纖小使兩家互救其短乃可以各見所長正不必論甘而忌辛好丹而非素也

四庫提要

秋谷年十六舉戊午鄉試第二人次年成進士館選是歲徵天下鴻博之儒五十人入翰林纂修明史諸公皆以績學雄文負天下重望秋谷以純綺之年未肯作三舍之避竹垞迦陵西河諸君子胥引爲忘年交久之遷官贊典晉闡試行以學術顯矣而恃才傲物爲京朝官所嫉時長生殿院本盛行秋谷尤所吝賞會國恤止樂織練未除顯大

諸名士徵歌縱酒言事者倚摭入奏各譴謫有差而秋谷遂坐是削籍年未三十也

國朝名  
家小傳

談龍錄論漁洋曰大家曰言語妙天下是亦足矣而謂愛好一言遂可以爲漁洋病則持門戶者之

過也

山左  
詩鈔

相傳某官行取御史入都以詩質於秋谷佐以土儀秋谷復之云土儀拜登詩集璧謝其人銜之於是有糾劾之事因文字而爲傾陷其人固不足道然秋谷所爲未免自處於薄矣又馮協一者文毅公之子也歿後其子檢遺彙求正於秋谷秋谷爲

之序嘲誚百端夫詩一藝耳已能之固無可驕人  
不能亦無可誚如驕而加之以薄無乃於溫柔敦  
厚之旨先自失乎

聽松廬詩話

王西澗見秋谷風鳶詩病其一字爲易之秋谷謝  
以詩云誰解攻吾短平生君尙存便應師一字何  
減和千言可見秋谷生平亦非全不服善者

同上

標題 井陘道歌七古 發澤州盡日行太行最深

處五古 太行巔望黃河歌七古 棄婦詞五古

海市七古 平望舟中七古 大庾嶺詠古

七古 韜光庵茆屋七古

摘句

作客一朝歸如夢久而寤

學道苦未精隨地爲喧靜

近山風轉急隔水月初生

久客嫌宵永初寒覺醉遲

罷官憐酒失去國覺天寒

敢銜湘水怨秣傷漆園居

路干殘雪消中見人自羣山闕處來

鞭影遠牽殘月色馬蹄寒踏斷冰聲

下馬身從千里外登堂夢隔十年前

客路遠隨殘月沒鄉心半向早寒生



賦因楊意凌雲易相比班超食肉難  
天高神自張威福歲旱人難料死生  
便恐蒼山都化冢賸憐碧海未揚塵  
扶衰地有君臣藥勸酒庭餘姊妹花

李孚青

字丹壑江南合肥人康熙十八年進士官編修在  
野香亭集

穎悟過人年未四十而歿

四庫提要

摘句 鄭家婢妾如師弟梁氏夫妻似主賓

王材任

字子重號西澗湖北黃岡人康熙十八年進士  
僉都御史有西澗詩鈔

進士鮮有至六十年者康熙己未進士至乾隆己  
未猶在而得與後輩稱前後同年有兩人焉一爲  
益都趙贊善秋谷一爲黃岡王僉都西澗時西澗  
年八十七秋谷年八十王重聽趙失明兩公耳目  
各廢其一而皆不廢吟咏

柳南  
隨筆

摘句 江湖夜靜逾空濶星斗風來欲動搖

一千里外新蓬鬢四十年前舊酒樓

梅庚

字耦長江南宣城人康熙二十年舉人有天逸閣集

雪坪爲竹垞先生所得士善八分書寫山水花卉皆具雅韻晚知泰順縣尋以病乞歸有兒童失學田園廢也算從官一度回之句病篤作詩別親舊至女夫一首未竟而卒署曰推枕吟云

國朝名家小傳

摘句 田家桑落酒風物藥租魚

聞說綠珠殊絕世我來偏覺墜樓時

落梅

國朝詩人徵略卷九